

seinem 71 Psalmen/also sagen: Verlasse mich Gott nicht im
 Alter/wann ich gray werde / bis ich deinen Arm verkündige
 Kindes Kindern / vnd deine krafft allen die noch kommen sol-
 len/so wird er vnns auch alle vnser Sünde vergeben/alle vn-
 sere Gebrechen heilen / vnser Leben vom Verderben erretten/
 mit Gnad vnd Barmhertzigkeit vns crönen/ vnsern Mund
 frölich machen/vnd vns endtlichen im Alter auch wie die Ad-
 ler verjüngern/Psal. 103. Daß wir auch im Alter newe kräfte
 kriegen / vnd mit David auß seinem 119 Psalmen sagen
 werden: Viam mandatorum tuorum cucurri, cum di-
 latasti cor meum. Wann du mein Herz tröstest / so lauffe
 ich den Weg deiner Gebot. Item: Ich suche dich von ganzem
 Herzen/laß mich nicht fehlen deiner Gebot. Ich behalte dein
 Wort inn meinem Herzen/ daß ich nicht wider dich sündige.
 Ich frewe mich deß Wegs deiner Zeugnissen/als über aller-
 ley Reichthumb. Ich rede was du befohlen hast/vnd schawe
 auff deine Wege. Ich habe lust zu deinen Rechten/vnd ver-
 gesse deiner Worten nicht/2c.

Weiln auch fürs zehende/ diß auch an dem Thruwerck zu
 sehen/daß solches allen Menschen dienet/Hohen vnd Niedern/
 Reichen vnd Armen/auch Guten vnd Bösen: Lehret vnns
 solches/daß wir Menschen solches auch thun sollen/vnd ein
 jeder in seinem Stande dem andern Neben Menschen vnd
 Christen dienen sollen / so hoch vnd so viel / vnd so gut er
 kan vnd vermag/wie vns dann darzu das heilige Wort Got-
 tes in Schrifften vnd Exempeln vermahnet. In Schrifften/
 Rom. 13. Seyt niemand nichts schuldig / dann daß ihr euch
 vntereinander liebet/dann wer den andern liebet / der hat das
 Gesetz erfüllet. Item / Dienet einander/ ein jeglicher mit der
 Gabe die er empfangen hat / als die guten Haushalter der
 mancherley Gaben Gottes / 1 Petr. 4. Vnd 1 Cor. 10. Ein
 jeder suche nicht was seyn ist / sondern was vielen frommet.